

L. SPARIAT

Dicho nouvialo

pèr lou Mariage de Felip e Nouëmìo Gilly

GÈNTO DAMISELLO,
BÈU JOUVÈNT,

I'a dins l'istòri santo un raconte talamen poulidet, talamen simple e naturau que fau que iéu vous lou digue tout-d'un-tèms. Devès, osco-seguro, vous n'en rapela, mai s'endevèn talamen bèn emé l'ate impourtant qu'anas coumpli dins aquelo umblo gleiseto de voste endré que vous agradara de l'ausi.

Toubìo estènt dins l'age mandè soun fiéu vers Gabèlus au païs di Mèdo, pèr regla 'n pichot afaire de famiho.

Prenènt sa biasso e soun bastoun, partiguè dounc lou jouine Toubìo acoumpagna d'un bèu juvenome incouneigu que pèr cop-d'astre se capitè just en aquéu moumen pèr ié rendre aquéu service. Aquéu juvenome amistados, que lou bon Diéu lou mandavo, èro tout simplamen lou bèl ange Rafèu. S'es di e de-longo se dis que li maridage eilamount soun escri en letro bèn-astrado dins lou grand libre di vivènt. E just s'endevèn que de long de la routo, l'ange Rafèu à Toubìo venguè coume eiçò:

- Faren pauso e auren la retirado encò de Raguèl qu'es toun ounce e ié demandaras sa fiho Saro pèr en faire ta mouié. À dous, lou camin es pas tant languissènt. E veici qu'intrèron encò de Raguèl qu'emé grand gau li reçaupè. Mai aqueste en devistant Toubìo, subran diguè à sa mouié Ano: Espincho un pau, tè, coume aquéu jouvènt douno d'èr à moun nebout.

Em' acò Raguèl i viajaire venguè tourna-mai: Toubìo qu'es moun fraire, lou couneissès? Eli respoudeguèron:

- Lou couneissèn. E coume Raguèl disié rèn que de bèn de soun fraire Toubìo, l'ange faguè: Aquéu Toubìo que vous entrevas d'éu es lou paire d'aquéu jouvènt!

E d'entèndre acò-d'aqui, Raguèl sus lou couele de Toubìo penjè sa bello tèsto en lou poutounant e plourant de bonur:

- O moun fiéu, s'escridè, que Diéu vous benesigue, car sias vous l'enfant d'un ome de bèn.